

Na osnovu člana 11. Odluke o uslovima, kriterijima i postupku dodjele sredstava za sufinansiranje mjera smanjenja aerozagađenja na području grada Tuzle („Službeni glasnik Grada Tuzla“ broj 2/20 i 6/20), Grad Tuzla, **dana 11.09.2020. godine**, objavljuje:

JAVNI POZIV
za dodjelu sredstava za sufinansiranje mjera smanjenja aerozagađenja
na području grada Tuzle u 2020. godini

I PREDMET JAVNOG POZIVA

Predmet ovog javnog poziva je dodjela sredstava iz Budžeta Grada Tuzle za 2020. godinu za sufinansiranje mjera smanjenja aerozagađenja u individualnim stambenim i individualnim stambeno-poslovnim objektima na području grada Tuzle.

Pod mjerama smanjenja aerozagađenja koje su predmet sufinansiranja podrazumijevaju se:

- a) nabavka i ugradnja toplotnih pumpi,
- b) “utopljanje” objekata u kojima se planira ugradnja toplotne pumpe, u vidu nabavke i ugradnje materijala za izolaciju vanjskih zidova i tavanice objekata i nabavke i ugradnje vanjske stolarije,
- c) nabavka i ugradnja kompaktnih toplinskih podstanica - KTP i
- d) nabavka i ugradnja kotlova sa isključivim pogonom na drvenu biomasu - peći na pelet.

Mjere smanjenja aerozagađenja koje nisu predmet sufinansiranja podrazumijevaju nabavku i ugradnju uređaja za zagrijavanje sa pogonom na električnu energiju.

II IZNOS SREDSTAVA ZA SUFINANSIRANJE

Ukupan iznos sredstava predviđen za sufinansiranje mjera smanjenja aerozagađenja na području grada Tuzle u 2020. godini po ovom javnom pozivu je 307.000,00 KM, u okviru kojeg iznosa će se za sufinansiranje mjera smanjenja aerozagađenja iz tačke I javnog poziva koristiti jednak iznos, odnosno iznosi od po 76.750,00 KM.

U slučaju neutroška cjelokupnog raspoloživog iznosa sredstava za sufinansiranje jedne mjere smanjenja aerozagađenja, neutrošeni dio sredstava će se koristiti za sufinansiranje drugih mjera smanjenja aerozagađenja.

Dodjela sredstava za sufinansiranje mjera smanjenja aerozagađenja vrši se u sljedećim iznosima:

- a) 50% od vrijednosti nabavke i ugradnje toplotne pumpe, a ne više od 5.000,00 KM,
- b) 50% od vrijednosti nabavke i ugradnje materijala za izolaciju vanjskih zidova, tavanice i nabavke i ugradnje vanjske stolarije, a ne više od 5.000,00 KM,
- c) 50% od vrijednosti nabavke i ugradnje KTP-a, a ne više od 4.000,00 KM ili
- d) 50% od vrijednosti nabavke i ugradnje peći na pelet, a ne više od 2.000,00 KM.

U okviru iznosa iz podtački a) i b), Grad Tuzla će finansirati troškove izvršenog energijskog pregleda objekta u iznosu od 50%, a ne više od 300,00 KM, osim u slučaju kada podnosilac prijave odustane od prijave, u kojem slučaju sam snosi navedene troškove.

III PREDMET PRIJAVE NA JAVNI POZIV

Predmet prijave na ovaj javni poziv, i to za mjere smanjenja aerozagađenja iz tačke II, podtačke a), b) i d), mogu biti individualni stambeni i individualni stambeno-poslovni objekti na području grada Tuzle, pod uslovom da se za objekat koji je predmet prijave na javni poziv ne može osigurati načelna saglasnost JKP „Centralno grijanje“ d.d. Tuzla za priključenje na sistem daljinskog grijanja, odnosno da ne postoje tehničke mogućnosti za priključenje objekta na sistem daljinskog grijanja.

Izuzetno, predmet prijave na ovaj javni poziv, i to za mjeru smanjenja aerozagađenja nabavka i ugradnja kompaktnih toplinskih podstanica, mogu biti i individualni stambeni i individualni

stambeno-poslovni objekti u obuhvatu zona toplifikacije usvojenih od strane Gradskog vijeća Grada Tuzla, za koje se može osigurati načelna saglasnost JKP “Centralno grijanje” d.d. Tuzla za priključenje na sistem daljinskog grijanja i za koje je u postupku priključenja na sistem daljinskog grijanja, u ime vlasnika objekta a putem JKP “Centralno grijanje” d.d. Tuzla, izdata posebna saglasnost Službe za komunalne poslove, izgradnju i poslove mjesnih zajednica Grada Tuzle za nabavku kompaktne toplinske podstanice.

IV POTREBNA DOKUMENTACIJA

Podnosilac prijave dužan je dostaviti sljedeće dokumente kojima dokazuje da ispunjava uslove za dodjelu sredstava za sufinansiranje mjera smanjenja aerozagađenja:

(a) dokaz o prijavljenom prebivalištu na adresi objekta koji je predmet prijave na javni poziv - obrazac izdat od strane MUP-a TK, ne stariji od 6 (šest) mjeseci, računajući od dana objave javnog poziva,

(b) zemljišnoknjižni izvadak, ne stariji od 6 (šest) mjeseci, izdat od strane Općinskog suda u Tuzli, ili posjedovni list, ne stariji od 6 (šest) mjeseci, izdat od strane Službe za geodetske i imovinsko-pravne poslove Grada Tuzle, za objekat koji je predmet prijave na javni poziv, odnosno za parcelu na kojoj je izgrađen objekat koji je predmet prijave na javni poziv ukoliko se radi o objektu koji nije uplanjen (ukoliko je objekat ili zemljište u suvlasništvu ili suposjedu uz zemljišnoknjižni izvadak ili posjedovni list potrebno je dostaviti ovjerenu izjavu suvlasnika ili suposjednika (Izjava 2 koja je prilog ovog javnog poziva) kojom se daje saglasnost za implementaciju mjera u objektu koji je predmet prijave na javni poziv),

(c) ovjerenu izjavu vlasnika ili posjednika (Izjava 2 koja je prilog ovog javnog poziva) kojom se daje saglasnost za implementaciju mjera u objektu koji je predmet prijave na javni poziv, zajedno sa zemljišnoknjižnim izvadkom ili posjedovnim listom za objekat, odnosno parcelu (dostavlja se ukoliko podnosilac prijave nije vlasnik ili posjednik objekta koji je predmet prijave na javni poziv, odnosno parcele na kojoj je izgrađen objekat koji je predmet prijave na javni poziv ukoliko se radi o objektu koji nije uplanjen),

(d) izjavu podnosioca prijave (Izjava 1 koja je prilog ovog javnog poziva) da je saglasan da za potrebe osiguranja dokaza o boravištu na adresi objekta koji je predmet prijave na javni poziv Služba za komunalne poslove, izgradnju i poslove mjesnih zajednica putem JP “Elektroprivreda” d.d. Sarajevo, Podružnica “Elektro distribucija” Tuzla, pribavi račune za uslugu snabdijevanja električnom energijom (boravište na adresi objekta koji je predmet prijave na javni poziv dokazuje se prosječnom potrošnjom električne energije od 100 kWh mjesečno za period od 3 (tri) mjeseca prije objave javnog poziva),

(e) izjavu podnosioca prijave (Izjava 1 koja je prilog ovog javnog poziva) da će u roku od najkasnije 24 (dvadesetčetiri) mjeseca, računajući od dana podnošenja blagovremenog i osnovanog zahtjeva za pregled implementirane mjere smanjenja aerozagađenja “utopljanje” objekta, prijaviti se na javni poziv za sufinansiranje mjere smanjenja aerozagađenja nabavka i ugradnja toplotne pumpe ili o vlastitom trošku izvršiti nabavku i ugradnju uređaja za zagrijavanje sa pogonom na električnu energiju,

(f) izjavu podnosioca prijave (Izjava 1 koja je prilog ovog javnog poziva) ovjerenu kod nadležnog organa da po izvršenoj ugradnji toplotne pumpe, peći na pelet ili KTP, iste neće otuđiti i koristiti uređaj za zagrijavanje objekta s pogonom na fosilna goriva, odnosno da po izvršenoj ugradnji uređaja sa pogonom na električnu energiju neće koristiti uređaj za zagrijavanje objekta s pogonom na fosilna goriva.

Obrasci izjava iz podtački b), c), d), e) i f) su u prilogu ovog javnog poziva i podnosioci prijave iste mogu preuzeti u Centru za pružanje usluga građanima (šalter sala Grada Tuzle) ili na zvaničnoj web stranici Grada Tuzla (grad.tuzla.ba).

Podnosilac prijave dužan je dokaze o ispunjavanju uslova za dodjelu sredstava za sufinansiranje dostaviti u originalu ili ovjerenoj fotokopiji, uz obaveznu naznaku kućne adrese i broja telefona podnosioca prijave.

Podnosioci prijava dužni su dostaviti svu dokumentaciju iz ove tačke javnog poziva, bez obzira na činjenicu da li je predmet prijave nabavka i ugradnja toplotnih pumpi, nabavka i ugradnja peći na pelet, nabavka i ugradnja KTP ili “utopljanje” objekata.

Dokazi o ispunjavanju uslova za dodjelu sredstava za sufinansiranje dostavljeni po ranijim javnim pozivima, a koji su ocijenjeni kao prihvatljivi, mogu se uvažiti u ovom javnom pozivu ukoliko nisu stariji od 6 (šest) mjeseci, te je podnosilac prijave po ovom javnom pozivu dužan dostaviti prijavu sa dokazima koji su ocijenjeni kao neprihvatljivi i/ili dokazima koji nisu dostavljeni u prvobitnoj prijavi.

NAPOMENA:

Ostale dokaze o ispunjavanju uslova za dodjelu sredstava za sufinansiranje mjera smanjenja aerozagađenja (računi za uslugu snabdijevanja električnom energijom i dokaz o postojanju tehničke mogućnosti za priključenje na sistema daljinskog grijanja) Grad Tuzla pribavlja po službenoj dužnosti.

Dokaz o energijskom pregledu objekta koji je predmet prijave na javni poziv (odnosi se samo na objekte u kojima se planira nabavka i ugradnja toplotne pumpe) izvršen od strane ovlaštenog lica u skladu sa Zakonom o energijskoj efikasnosti u Federaciji Bosne i Hercegovine (“Službene novine Federacije BiH”, broj: 22/17), koji uključuje predmjer i predračun radova koji su predmet predloženih mjera, podnosioci prijava dužni su dostaviti u roku do 45 (četrdesetpet) dana, računajući od dana posljednje objave preliminarne liste kojom se utvrđuje ispunjavanje uslova iz ove tačke javnog poziva.

Informaciju o licima ovlaštenim za vršenje energijskog pregleda objekta zainteresovana lica mogu dobiti u Federalnom ministarstvu prostornog uređenja, putem telefona +387 33 726 516, ili linka www.ee-infos.ba/registri/.

Smatra se da je podnosilac prijave odustao od prijave na javni poziv ukoliko u roku do 45 (četrdesetpet) dana od dana posljednje objave preliminarne liste ne dostavi dokaz o energijskom pregledu objekta koji je predmet prijave na javni poziv.

Po utvrđivanju ispunjavanja općih uslova za dodjelu sredstava, Komisija za provođenje postupka po javnom pozivu će pozvati podnosiocima prijave čiji su predmet objekti za koje se ne može osigurati načelna saglasnost JKP „Centralno grijanje“ d.d. Tuzla za priključenje na sistem daljinskog grijanja da se pismeno opredijele za nabavku i ugradnju toplotne pumpe ili peći na pelet, nakon čega će, u skladu sa površinama objekata koje utvrđuje Komisija za pregled implementiranih mjera, Komisija za provođenje postupka po javnom pozivu sačiniti i objaviti konačnu rang listu podnosilaca prijava koji ispunjavaju uslove za dodjelu sredstava za sufinansiranje nabavke i ugradnje peći na pelet i konačnu rang listu podnosilaca prijava koji ispunjavaju uslove za dodjelu sredstava za sufinansiranje nabavke i ugradnje KTP, dok će konačnu rang listu za „utopljanje“ objekata i nabavku i ugradnju toplotnih pumpi objaviti po dostavljanju od strane podnosioca prijave dokaza o izvršenom energijskom pregledu. **Smatra se da je podnosilac prijave koji u ostavljenom roku ne dostavi navedeno izjašnjenje odustao od prijave na javni poziv.**

Lista nepotpunih, formalno neispravnih i potpunih prijava koje ne ispunjavaju opće uslove iz ovog javnog poziva, preliminarne lista podnosilaca prijava koji ispunjavaju opće uslove za dodjelu sredstava za sufinansiranje mjere smanjenja aerozagađenja „utopljanje“ objekta ili mjere smanjenja aerozagađenja nabavka i ugradnja toplotne pumpe i konačne rang liste podnosilaca prijava koji ispunjavaju uslove za dodjelu sredstava za sufinansiranje nabavke i ugradnje peći na pelet ili KTP objavljuju se na oglasnoj tabli i web stranici Grada Tuzle, kao i oglasnim tablama mjesnih zajednica.

Na listu nepotpunih, formalno neispravnih i potpunih prijava koje ne ispunjavaju opće uslove iz ovog javnog poziva podnosioci prijava mogu podnijeti prigovor pomoćniku gradonačelnika za Službu za komunalne poslove, izgradnju i poslove mjesnih zajednica, u roku od 8 (osam) dana, računajući od dana posljednje objave rang liste.

Realizaciji mjera, odnosno nabavci i ugradnji toplotnih pumpi i materijala za „utopljanje“ objekta, podnosioci prijava mogu pristupiti tek po zaključenju ugovora o sufinansiranju koji će sadržavati prava, obaveze i odgovornosti ugovornih strana.

Realizaciji mjere, odnosno nabavci i ugradnji KTP, podnosioci prijava mogu pristupiti po dobijanju posebne saglasnosti za nabavku KTP iz tačke III javnog poziva, ili zaključenju ugovora o sufinansiranju.

Realizaciji mjere, odnosno nabavci i ugradnji peći na pelet, podnosioci prijava mogu pristupiti tek po zaključenju ugovora o sufinansiranju i dobijanju prethodne saglasnosti na predračun za peć na pelet od strane Komisije za pregled implementiranih mjera.

Dodjela sredstava za sufinansiranje mjera smanjenja aerozagadenja vrši se nakon što podnosilac prijave-korisnik sredstava, u roku utvrđenom u ugovoru o sufinansiranju, u potpunosti i o vlastitom trošku iste implementira i nakon što dostavi pismeni zahtjev za pregled implementiranih mjera, sa računom-fakturom za implementirane mjere koje su predmet sufinansiranja, računom za izvršeni energijski pregled objekta u kojem se vrši „utopljanje“ objekta ili nabavka i ugradnja toplotne pumpe, kao i dokazima o plaćanju u formi potpisane i ovjerene izjave isporučioaca kojom se potvrđuje da je od strane podnosioca prijave-korisnika sredstava izvršena uplata prema računima – fakturama.

V KRITERIJ ZA DODJELU SREDSTAVA

Kriterij za rangiranje podnosilaca prijava čiji je predmet objekat u kojem se vrši nabavka i ugradnja toplotne pumpe i „utopljanje“ objekta predstavlja iznos vrijednosti utroška toplotne energije izražen u kWh/m² godišnje.

Kriterij za rangiranje podnosilaca prijava čiji je predmet objekat u kojem se vrši nabavka i ugradnja peći na pelet ili KTP predstavlja grijna površina objekta.

Smatra se da je prvi na konačnoj rang listi podnosilac prijave čiji objekat ima najnižu vrijednost utroška toplotne energije izražen u kWh/m² godišnje, odnosno podnosilac prijave čiji objekat ima najmanju površinu.

VI ROK I NAČIN PODNOŠENJA PRIJAVA NA JAVNI POZIV

Javni poziv ostaje otvoren 15 (petnaest) dana, zaključno sa danom 26.09.2020. godine, a objavit će se na oglasnoj tabli i web stranici Grada Tuzle, kao i na oglasnim tablama mjenih zajednica na području grada Tuzle.

Neblagovremene prijave i prijave koje nisu dostavljene u skladu sa tačkom IV javnog poziva neće se uzeti u razmatranje.

Prijave na javni poziv sa propisanom dokumentacijom dostavljaju se u zatvorenoj koverti putem Centra za pružanje usluga građanima (šalter sala Grada Tuzle) ili preporučeno poštom na adresu:

GRAD TUZLA

**Služba za komunalne poslove, izgradnju i poslove mjesnih zajednica
Ul. ZAVNOBIH-a broj 11, 75000 Tuzla, Bosna i Hercegovina**

sa naznakom:

„Prijava na Javni poziv za dodjelu sredstava za sufinansiranje mjera smanjenja aerozagadenja na području grada Tuzle za 2020. godinu – NE OTVARATI“

Sve dodatne informacije o načinu i postupku učešća u javnom pozivu mogu se dobiti u Službi za komunalne poslove, izgradnju i poslove mjesnih zajednica Grada Tuzle, Komisija za provođenje postupaka po javnim pozivima, putem telefona +387 35 307 340.